

萬有文庫

第二集七百種

王雲五主編

歷代名人書札

附續編

(二)

吳會祺編

歷代名人書札

附續編

(二)

吳曾祺編

國學基本叢書

萬有文庫

第二集七百種

總編輯者

王雲五

商務印書館發行

歷代名人書札卷二

五代

李襲吉爲晉王貽梁祖書

李克用引軍追躡黃巢過汴州。朱全忠館之於上源驛。禮甚恭。克用被酒。以全忠故降將。語侵之。全忠怒。其夜引兵圍驛。克用走免。遂與全忠構兵累年。書中毒手尊拳數語。卽指其事也。

一別清德。十有餘年。失意杯盤。爭鋒劍戟。山長水闊。難追二國之歡。雁逝魚沈。久絕八行之賜。比者僕與公實聯宗姓。原忝恩知。投分深情。將期棲託。論交馬上。薦美朝端。傾嚮仁賢。未省疎闊。豈謂運由奇特。謗起奸邪。毒手尊拳。交相於暮夜。金戈鐵馬。蹂踐於明時。狂藥致其失歡。陳事止於堪笑。今則皆登貴位。盡及中年。遽公亦要知非。君子何勞用壯。今公貴先列辟。名過古人。合縱連衡。本務家邦之計。拓地守境。要存子孫之基。文王貴奔奏之交。仲尼譚損益之友。僕顧慙虛薄。舊忝眷私。一言許心。萬死不悔。壯懷忠力。猶勝他人。盟於三光。願赴湯火。公又何必終年立敵。懸意相窺。徇一時之威靈。取四郊之倦弊。今日得其小衆。明日下其危牆。弊師無遺鏃之憂。鄰壤抱剝牀之痛。又慮悠悠之黨。忘瀆聽聞。見僕韜勇枕威。戢兵守境。不量本末。誤致窺覷。且僕自壯歲已前。業經陷敵。以殺戮爲東作。號兼并爲永謀。及其首陟師壇。躬被公袞。天子命我爲羣后。明公許我以下交。所以斂迹愛人。蓄兵務德。收燕薊則還其故將。入蒲坂而不負前言。況五載休兵。三邊校士。鐵騎犀甲。雲屯谷量。馬邑兒童。皆爲銳將。鷺峰宮闕。咸作京坻。問年猶少。

於仁明。語地幸依於險阻。有何覘覩。便誤英聰。況僕臨戎握兵。粗有操斷。屈伸進退。久貯心期。勝則撫三晉之民。敗則徵五部之衆。長驅席卷。反首提戈。但慮隱突中原。爲公後患。四海羣謗。盡歸仁明。終不能見僕一夫。得僕一馬。銳師倘失。則難整齊。請防後艱。願存前好。矧復陰山部落。是僕懿親。回紇師徒。累從外舍。文靖求始畢之衆。元海徵五部之師。寬言虛詞。猶或得志。今僕散積財而募勇輩。輦寶貨以誘義戎。徵其密親。啗以美利。控弦跨馬。甯有數乎。但緣荷位天朝。惻心疲瘵。歲歲亭障。未忍起戎。亦望公深識鄙懷。洞迴英鑒。論交釋憾。慮禍革心。不聽浮譚。以傷霸業。夫易惟忌滿。道貴持盈。儻恃勇以喪師。如擊盤而失水。爲蛇刻鶴。幸賜徊翔。僕少負褊心。天與真氣。間謀詭論。誓不爲之。惟將藥石之譚。願託金蘭之分。倘愚衷未豁。彼抱猶迷。假令罄三朝之威。窮九流之辯。遺迴肝膈。如俟河清。今者執簡吐誠。願垂保鑒。僕自眷私。睽阻翰墨往來。或有鄙詞。稍侵英聽。亦承嘉論。每賜罵言。敍歡旣罷於尋戈。焚謗幸燭其載筆。窮因尙口。樂貴和心。願祛沈闕之嫌。以復壘篴之好。今者卜於曩分。不欲因人。專遣使乎。直詣鈴閣。古者兵交兩地。使在其間。致命受辭。幸存前志。昔賢貴於投分。義士難於屈讐。若非仰戀恩私。安可輕露肝膈。悽悽丹慄。炳炳血情。臨紙嚮風。千萬難述。

李愚勸韓建討賊書

昭宗乾甯二年。建與王行瑜。李茂貞。舉兵犯闕。謀廢立。聞李克用兵將至。乃各還本鎮。書中言二豎之首。傳於天下。卽指行瑜。茂貞也。建不從。後爲朱全忠所殺。

僕關東一布衣耳。幸讀書爲文。每見父子君臣之際。有傷教害義。恨不得肆之市朝。明公居近關重鎮。君

父幽辱月餘。坐視凶逆。而忘勤王之舉。僕所未喻也。僕竊計中朝輔弼。雖有志而無權。外鎮諸侯。雖有權而無志。惟明公忠義社稷是依。往年車輅播遷。號泣奉迎。累歲供饋。再復廟朝。義感人心。至今歌詠。此時事勢尤異。前日明公地處要衝。位兼將相。自宮闈變故。已涉旬時。若不號令。率以先圖反正。遲疑未決。一朝山東侯伯。唱義連衡。鼓行而西。明公求欲自安。其可得乎。此必然之勢也。不如馳檄四方。諭以逆順。軍聲一振。則元凶破膽。旬浹之間。二豎之首。傳於天下。計無便於此者。

徐鉉復方訥書

南唐元宗時。陳覺馮延巳。愚弄其主。軍師屢動。國用虛耗。鉉與韓熙載屢陳其姦。不聽。及周師至。淮南不守。故書中言及之。

鉉以疎拙之性。頑滯之資。廁於人曹。無足比數。然以荷先人之業。猥踐清貫。讀往聖之書。頗識通方。累朝舊恩。漸於肌骨。至於行道濟物。立身揚名。報國士之知。成天下之務。竊不自揆。頗嘗有心。故膺耳目之寄。當津要之路。侃然受任。不以爲憂。而才與心違。命與運背。言出而不能悟。主身廢而無足救時。三年之中。百艱備歷。干戈擾於內地。烽火照於闕庭。奔走道路。容身靡所。當此時也。苟得耕於南畝。齊於一民。以斯終焉。尙爲幸也。而副君將聖。王道漸亨。博採遺賢。以濟多難。贊諭之任。首及非才。拜命以來。翻自憂媿。何者。儲后踐納麓之重。而處於承顏之地。有從諫之善。而立於無過之場。徒欲持稊米以實太倉。秉燭火以助義御。恐不足以副上德之舉。塞故人之望也。但當正身潔己。徇公滅私。使內不媿於本心。外不違於所學而已。閣下德我太甚。期我太深。歷陽郡佐白君至京。辱貺手札。慶譽優渥。勗勵殷勤。知己之情。無以過。

此然此副日君之垂顧。乃昔時閣下前席品題之所致也。絨藏佩服。何日忘之。今兵難少甯。烝民未泰。頂踵利物。斯實其時。閣下高臥已久。羣望頗鬱。宣室之召。期在不遠。勉愼興居。以副翹企。悽悽之意。遲用面諭。不宜再拜。

徐鉉答林正字書

十一月日。復書正字足下。辱賜長牋。詞高旨遠。循環捧讀。欲罷不能。見顧之深。良足愧也。吾子以老成之智。蘊救世之心。一言悟主。俯拾初筮。雖位未充量。然升聞特達。超然獨異。亦古之所難也。推是而往。其道可知。鉉也不才。猥廁先達。雖復識不能見之於未兆。才不能濟之於已形。然而振天下之公議。舉天下之公器。推轂後進。心無適莫。庶幾不下於昔賢。吾子異日當知爲不妄。其古今之變。安危之勢。忽乎微哉。未可一二以言語盡也。謹俟暇日。當接餘論。聊奉還答。伏惟鑒悉。徐鉉白。

宋

張詠答王觀察書

少年無思算。好陪狂徒。高談極飲。致踰壯歲。方遂策名。洎於登朝。又倅邊郡。塞外清帖。公中事稀。日與虎侯雜戲爲樂。五木未止。六博已興。投壺奕碁。排象旋子。斯實眇末。無足快心。其所至者。蹴鞠引強。擊射算帖。攘袂掣肘。嗥呼爭贏。有以壯臨軍之容。資佳會之具。其或八月草枯。皆縱獵寒風吹面。則皴裂皮膚。驚塵隨人。則緇黑衣履。渴飲已冰之酒。飢餐連血之肉。馬不絕馳。弓不下臂。知得俊爲快。不知勞筋爲苦也。又若天清氣和。列坐暢飲。樂奏繁劇。貔貅引前。盤槊擊劍。以電轉奔騎。角觝以虎爭。餘興未窮。三巨觥相罰。非倒甕。非頽冠。略未云止。與希生者道。真堪喪魂。時弟年方盛。氣尙壯。酒量過常。遂成飲癖。洗入膜內。棲於鬲中。良醫不逢。積痼成疾。陰濁之氣。久而下垂。旣漸逼於膀胱。實難歸於胃腑。下洩無路。上蒸爲瘡。如斯之深。又將一紀。與膏肓以同道。亦腐脇之異名。縱得神醫。亦難措手。誠由性愚。不知攝養。貪酒不知撙節之所致也。非身災命滯之有云。有時暫食瘡痛。飲水血流。到闕二旬。未能入見。上負明君捨爵之恩。下累平生行心之願。由此而較。乃是罪人。數年前兄爲中執。中執者。諸侯跋扈。宰相弄權。授受匪人。風教頗僻。法度愈紊。私謁公行。繩違整綱。真執憲之用也。俾天子之道。廓如坦途。訥濫之蹤。泯然云絕。豈異乎獬豸有睨。太阿欲揮。持正之風。凜然可懼。故公卿庶正。不可得而治也。兄懇苦相念。略無避嫌。親染簡題。手封靈藥。遠在千里。致於下交。必欲祛弟羸病。使之丁壯。起弟驅走。使之報君。有以見君子之用心。憂於

人急於義。不與古賢並者。誰可方。爰屬阻修。尋闕報復。諒不以爲慢。而信爲感之深。兄臨民有仁。馭遠有術。苦寒在候。善飯是宜。無任祝頌瞻望之至。

穆修答喬適書

修以治經聞。與种放齊名。天下稱爲仲穆。又善古文。適以書就正所業。修告之如此。

近辱書。并示文十篇。終始讀之。其命意甚高。自及淮西來。嘗見人言足下少年樂喜文。固耳聞而心存之。但未敢輕取人說。遂果知足下能然。蓋古道息絕。不行於時已久。今世士子。習尙淺近。非章句聲偶之辭。不置耳目。浮軌濫轍。相跡而奔。靡有異塗焉。其間獨取以古文語者。則與語怪者同也。衆又排詬之。罪毀之。不目以爲迂。則指以爲惑。謂之背時遠名。闕於富貴。先進則莫有譽之者。同儕則莫有附之者。其人苟失自知之明。守之不以固。持之不以堅。則莫不懼而疑。悔而思。忽焉且復去此而卽彼矣。噫。仁義中正之士。豈獨多出於古。而鮮出於今哉。亦由時風衆勢。驅遷溺染之。使不得從乎道也。觀足下十篇之文。則信有志乎古矣。其書之問。則曰將學於今。則成淺陋。將學於古。則懼不得取名於世。學宜何旨。引韓先生師說之說。以求解惑爲請。足下當少秀之年。懷進取之機。又學古於仁義不勝之時。與之者寡。非之者衆。不得無惑於中焉。是以枉書見問。某不才而棄於時者也。何足爲人質。其是非可否。徒以退拙無所用心。因得從事於不急之學。知舊者不識其愚。且慙。或謂之爲好古焉。故足下以是厚相期待者。蓋感其聲而求其類乎。可不少復其意耶。試爲足下言之。夫學乎古者。所以爲道。學乎今者。所以爲名。道者仁義之謂也。名者爵祿之謂也。然則行道者有以兼乎名。守名者無以兼乎道。何者。行夫道者。雖固有窮達云耳。然而

達於上也。則爲賢公卿。窮於下也。則爲令君子。其在上則禮成乎君。而治加乎人。其在下則順悅乎親。而勤修乎身。窮也達也。皆本於善稱焉。守夫名者。亦固有窮達云耳。而皆反乎是也。達於上也。何賢公卿乎。窮於下也。何令君子乎。其在上則無所成乎君。而加乎人。其在下則無所悅乎親。而修乎身。窮也達也。皆離於善稱焉。故曰行道者。有以兼乎名。守名者。無以兼乎道。有其道而無其名。則窮不失爲君子。有其名而無其道。則達不失爲小人。與其爲名達之小人。孰若爲道窮之君子。矧窮達又各繫其時遇。豈古人道有負於人耶。足下有志乎道。而未忘名。樂聞於古。而喜求於今。二者之心。苟交存而無擇。將懼純明之性。寢微浮躁之氣。驟勝矣。足下心明乎仁義。又學識其歸嚮。在固守而弗離。堅持而弗奪。力行而弗止。則必立乎名之大者矣。學之正僞有分。則文之指用自得。何惑焉。不宣。

晏殊答樞密范給事書

殊聞之於師曰。經者。世之典常也。無典常則制不立。學者。人之砥礪也。無砥礪則器不備。以周公之才。朝讀書百篇。夕見七十二士。猶恐不足。以仲尼之聖。自謂非生而知之。好古敏以求之。易象天地之準矣。乃曰。君子學以聚之。問以辨之。商書帝王之範矣。亦曰。王人求多聞。時惟建事。學於古訓。乃有獲。然則生民以來。鉅聖大賢。未有捨夫學者。西漢中葉。儒教尤盛。公孫宏。董仲舒。用經義決朝廷大政。綽有風采。夏陽男子。犢車詣闕。自號戾園。萬目皇皇。未知所措。雋不疑侃然正色。引春秋而戮之。孝宣霍光。擊節驚歎。且曰。公卿大臣。當用經術。明於大誼。降於東漢。茲道彌篤。唐柳冕有言。西漢尙儒。明於理亂。是以其人智。東漢尙章句。師其傳習。是以其人守名節。此其效也。前代爲學。迭相師授。是以聖人之旨。無不坦明。近世業

儒怠於講肄。是以先王格訓。有所滯濛。唐李善精於文選。爲之註解。因用教授。謂之文選學。皇朝太平興國中。詔館閣讎校漢書。安德裕取西域傳山川名號字之古者。改附近古集語。錢熙謂人曰。予於此書特經師授。皆有訓說。豈可胸臆塗竄。以合詞章。則知文選漢書。尙行教授。經墳大典。可廢講乎。殊嘗切志茲說。以悟朋從。至於唱導儒風。恢崇教本。雖有素蘊。未能及也。今者明公過聽。愛忘其陋。惠貺與侍講孫公書。述岷山人武陵昌期博貫諸經。召寘門下。樞鉉之隙。與之論議。且欲出其撰述。質於大儒。辨正否臧。以明公共。齋盥披讀。載欣以忭。首見執事經國佐王之志。中見執事樂道尙賢之素。末見執事選衆成人之美。非夫操尙敦懿。規模宏廓。元元本本。焯見天人。明自乎誠。覺先乎後。恤橫目之流放。勤洗心而拯接。則安能屈彥輔之重。勗傾生之樂。不遠百舍。命蒿萊之隱淪。惕見分陰。紉細素之潭奧。恂恂汲汲。若是之深厚哉。夫然則穆微風。養萬物。致隆平。頌清廟。躋大猷於義昊。紹丕績乎衡旦。斯有日矣。眷惟屏虛。無足稱算。猥沐甄采。參於季孟。私用澡槃靈府。溫循宿藝。賀吾道之有宗主。跂斯人之蒙潤澤。奚獨五典琴筑。三年呻吟。腐屑以守黃卷。焦心而窺斷簡者哉。機軸嚴密。慮難省謁。敢布肝鬲。復干闕侍。

謝絳游嵩山寄梅殿丞書

近有使者東來。付僕詔書。并御祝封香。遣告嵩岳。太常移文。合用讀祝捧幣二員。府以歐陽永叔楊子聰分攝。會尹師魯王幾道。至自緱氏。因思早時約聖俞有太室中峯之行。聖俞中春時遂往。僕爲人閒事所窘。未遑也。今幸其便。又二三子可以爲山水游侶。然亟與之議。皆喜見顏色。不戒而赴。十二日。晝漏未盡十刻。出建春門。宿十八里河。翌日過緱氏。閱遊嵩詩碑。碑字甚大而未鐫。上緱嶺。尋子晉祠。陟轅轅。道入

登封出北門。齋于廟中。是夕寢。既興。吏白五鼓。有司請朝服行事。事已。謁新治宮。拜真宗御容。稍卽山麓。至峻極中院。始改冠服。卻車徒。從者不過十數人。輕齋遂行。是時秋清日陰。天未甚寒。晚花幽草。虧蔽石壁。正當人力清壯之際。加有朋簪談燕之適。升高臨險。氣豪心果。遇盤石。過大樹。必休其上下。酌酒飲茗。傲然者久之。道徑差平。則腰輿以行。嶄崿斗甚。則芒蹻以進。窺玉女窗。搗衣石。石誠異。窗則亡有。迺邇至八仙壇。憩二醉石。徧視墨跡。不復存矣。考乎三君所賦。亦名過其實。午昃方抵峻極上院。師魯體最溢。最先到。永叔最少。最疲。於是浣漱食飲。從容閒躋。封禪壇下。瞰羣峯。乃向所跂而望之。謂非插翼不可到者。皆培塿焉。邑居樓觀。人物之夥。視若蟻壤。武后封祀碑故存。自號大周。當時名賢皆無姓名於碑陰。不虞後代之譏其不典也。碑之空無字處。覩聖俞記樂理國而下四人同遊。錢刻尤精。僕意古帝王祀天神紀功德於此。當時尊美甚盛。後之君子不必廢之壞之也。又尋韓文公所謂石室者。因盡詣東峯頂。是夕宿頂上。會幾望。天無纖翳。萬里在目。子聰疑去月差近。令人浩然。絕世間慮。盤桓立清露下。直覺冷透骨。髮羸體將不堪。可方卽舍張燭。且豐饌醴。五人者相與岸幘褰帶。環坐滿引。賦詩談道。間以謔劇。然不知形骸之累。利欲之萌。爲何物也。夜分少就枕以息。明日訪歸路。步履無苦。昔聞鼯鼠窮技。能下而不能上。豈近此乎。午間至中院。邑大夫來逆。其禮益謹。申刻出登封西門。道潁陽。宿金店。十六日晨發。據鞍縱望。太室猶在後路。曲南西則但見少室。若夫觀少室之美。非繇茲路則不能盡。諸邑人謂之冠子山。正得其狀。自行七十里。出潁陽北門。訪石堂山。紫雲洞。卽邢和璞著書之所。山徑極峻。捫蘿而上者七八里。上有大洞。蔭數畝。水泉出焉。久爲道士所居。爨煙熏燎。又塗塹其內。已戒邑宰稍營草屋於側。徙而出之。此間峯

勢危絕。大抵相向。如巧者爲之。又峭壁有若四字云。神清之洞。體法雄妙。蓋薛老峯之比。諸君疑古苔辭自成文。又意造化者筆焉。莫得究其本末。少留數十刻。會將雨而去。猶冒夜行二十五里。宿呂氏店。馬上粗苦疲厭。則有師魯語怪。永叔子聰歌俚調。幾道吹洞簫。往往一笑絕倒。豈知道路之短長也。十七日宿鼓婆鎮。遂緣伊流。陟香山上上方。飲於八節灘上。始自峻極中院未及此。凡題名於壁於石於樹間者。蓋十有四處。大凡出東門。極東而南之。自長夏門入。繞崧轅一匝。四百里。可謂窮極勝覽。切切未滿志者。聖俞不與焉。今旣還府。恐相次便有塵事侵汨。故急寫此奉報。庶代一昔之談。

歐陽修上范司諫書

范仲淹先以言事忤太后。出判河中。徙陳州。召還爲右司諫。歐陽公作此書寄之。未幾。仲淹以諫廢。后出知睦州。

前月中得進奏吏報云。自陳州召至闕。拜司諫。卽欲爲一書以賀。多事卒卒。未能也。司諫七品官爾。於執事得之不爲喜。而獨區區欲一賀者。誠以諫官者。天下之得失。一時之公議繫焉。今世之官。自九卿百執事。外至一郡縣吏。非無貴官大職。可以行其道也。然縣越其封。郡逾其境。雖賢守長。不得行。以其有守也。吏部之官。不得理兵部。鴻臚之卿。不得理光祿。以其有司也。若天下之得失。生民之利害。社稷之大計。惟所見聞。而不繫職司者。獨宰相。可行之。諫官可言之爾。故士學古懷道者。仕於時。不得爲宰相。必爲諫官。諫官雖卑。與宰相相等。天子曰不可。宰相曰可。天子曰然。宰相曰不然。坐乎廟堂之上。與天子相可否者。宰相也。天子曰是。諫官曰非。天子曰必行。諫官曰必不可行。立殿陛之前。與天子爭是非者。諫官也。宰相尊。

行其道。諫官卑行其言。言行道亦行也。九卿百司郡縣之吏。守一職者。任一職之責。宰相諫官。繫天下之事。亦任天下之責。然宰相九卿而下。失職者。受責於有司。諫官之失職也。取譏於君子。有司之法。行乎一時。君子之譏。著之簡冊。而昭明垂之百世。而不泯。甚可懼也。夫七品之官。任天下之責。懼百世之譏。豈不重邪。非材且賢者。不能爲也。近執事始被召於陳州。洛之士大夫相與語曰。我識范君。知其材也。其來不爲御史。必爲諫官。及命下。果然。則又相與語曰。我識范君。知其賢也。他日聞有立天子陛下。直辭正色。面爭廷論者。非他人。必范君也。拜命以來。翹首企足。竚乎有聞。而卒未也。竊惑之。豈洛之士大夫。能料於前而不能料於後也。將執事有待而爲也。昔韓退之。以爭臣論。以譏陽城。不能極諫。卒以諫顯。人皆謂城之不諫。蓋有待而然。退之不識其意。而妄譏。修獨以謂不然。當退之作論時。城爲諫議大夫。已五年。後又二年。始廷論陸贄。及阻裴延齡作相。欲裂其麻。纔兩事爾。當德宗時。可謂多事矣。授受失宜。叛將強臣。羅列天下。又多猜忌。進任小人。於此之時。豈無一事可言。而須七年耶。當時之事。豈無急於阻延齡論陸贄兩事也。謂宜朝拜官而夕奏疏也。幸而城爲諫官七年。適遇延齡陸贄事。一諫而罷。以塞其責。向使止五年六年。而遂遷司業。是終無一言而去也。何所取哉。今之居官者。率三歲而一遷。或一二歲。甚者半歲而遷也。此又非一可以待乎七年也。今天子躬親庶政。化理清明。雖爲無事。然自千里詔執事而拜是官者。豈不欲聞正議而樂讜言乎。然今未聞有所言說。使天下知朝廷有正士。而彰吾君有納諫之明也。夫布衣韋帶之士。窮居草茅。坐誦書史。常恨不見用。及用也。又曰彼非我職。不敢言。或曰我位猶卑。不得言。得言矣。又曰我有待。是終無一人言也。可不惜哉。伏惟執事思天子所以見用之意。懼君子百世之譏。一陳昌

言以塞重望。且解洛士大夫之惑。則幸甚幸甚。

歐陽修與蔡君謨求書集古錄序書

君謨名襄。以書名。適公方作集古錄序。因寄君謨乞書之。

修啓。邇在河朔。不能自閑。嘗集錄前世金石之遺文。自三代以來。古文奇字。莫不皆有。中間雖罪戾擯斥。水陸奔走。顛危困踣。兼之人事吉凶。憂患悲愁。無聊倉卒。未嘗一日忘也。蓋自慶歷乙酉。逮嘉祐壬寅。十有八年。而得千卷。顧其勤至矣。然亦可謂富哉。竊復自念。好嗜與俗異馳。乃獨區區收拾世人之所棄者。惟恐不及。是又可笑也。因輒自敘其事。庶以見其志焉。然顧其文鄙意陋。不足以示人。既則自視前所集錄。雖浮屠老子詭妄之說。常見貶絕於吾儒者。往往取之而不忍遽廢者。何哉。豈非特以其字畫之工邪。然則字書之法。雖爲學者之餘事。亦有助於金石之傳也。若浮屠老子之說。當棄而獲存者。乃直以字畫而傳。是其幸而得所託爾。豈特有助而已哉。僕之文陋矣。顧不能以自傳。其或幸而得所託。則未必不傳也。由是言之。爲僕不朽之託者。在君謨一揮毫之頃爾。竊維君子樂善。欲成人之美者。或聞斯說。謂宜有不能卻也。故輒持其說以進而不疑。伏惟幸察。

歐陽修與刁景純學士書

公年二十二。謁學士胥偃於南陽。偃奇之。因妻以女。及寶元二年。偃卒。時公方罷乾德令。奉母待次南陽。聞之。因作此書。

修頓首啓。近自罷乾德。遂居南陽。始見謝舍人。知丈丈內翰凶訃。聞問驚怛。不能已已。丈丈位望並隆。然

平生亦嘗坎壈。數年以來。方履亨塗。任要劇。其去大用。尺寸間爾。豈富與貴不可力爲。而天之賦予。多少有限邪。凡天之賦予人者。又量何事而爲之節也。前旣不可詰。但痛惜感悼而已。某自束髮爲學。初未有一人知者。及首登門。便被憐獎。開端誘道。勤勤不已。至其粗若有成而後止。雖其後遊於諸公。而獲齒多士。雖有知者。皆莫之先也。然亦自念不欲效世俗子。一遭人之顧己。不以至公相期。反趨走門下。脅肩諂笑。甚者獻讒諛而備使令。以卑昵自親。名曰報德。非惟自私。直亦待所知以不厚。是故懼此。惟欲少勵名節。庶不泯然無聞。用以不負所知爾。某之愚誠。所守如此。然雖胥公亦未必諒某此心也。自前歲得罪夷陵。奔走萬里。身日益窮。迹日益疎。不及再聞語言之音。而遂爲幽明之隔。嗟夫。世俗之態。旣不欲爲愚誠所守。又未克果。惟有望門長號。臨柩一奠。亦又不及。此之爲恨。何可道也。徒能惜不永年。與未大用。遂與道路之人同歎爾。知歸葬廣陵。遂謀京居。議者多云不便。而聞理命若斯。必有以也。若須春水下汴。某歲盡春初。當過京師。尙可一拜見。以盡區區。身賤力微。於此之時。當有可致。而無毫髮之助。慚愧慚愧。不宣。

歐陽修與荆南樂秀才書

修頓首白。秀才足下。前者舟行往來。屢辱見過。又辱以所業一編。先之啓事。及門而贊。田秀才西來。辱書其後。予家奴自府還縣。比又辱書。僕有罪之人。人所共棄。而足下見禮如此。何以當之。當之未暇答。宜遂絕。而再辱書。再而未答。宜絕。而又辱之。何其勤之甚也。如修者。天下窮賤之人爾。安能使足下之切切如是耶。蓋足下力學好問。急於自爲謀。而然也。然蒙索僕所爲文字者。此似有所過聽也。僕少從進士舉。於有司。學爲詩賦。以備程試。凡三舉而得第。與士君子相識者多。故往往能道僕名字。而又以游從相愛之。

私或過稱其文字。故使足下聞僕虛名。而欲見其所爲者。由此也。僕少孤貧。貪祿仕以養親。不暇就師窮經。以學聖人之遺業。而涉獵書史。姑隨世俗。作所謂時文者。皆穿蠹經傳。移此僣彼。以爲浮薄。惟恐不悅於時人。非有卓然自立之言。如古人者。然有司過採。屢以先多士。及得第已來。自以前所爲。不足以稱有司之舉。而當長者之知。始大改其爲。庶幾有立。然言出而罪至。學成而身辱。爲彼則獲譽。爲此則受禍。此明效也。夫時文雖曰浮巧。然其爲功亦不易也。僕天資不好。而強爲之。故比時人之爲者。尤不工。然已足以取祿仕。而竊名譽者。順時故也。先輩少年志盛。方欲取榮譽於世。則莫若順時。天聖中。天子下詔書。勅學者去浮華。其後風俗大變。今時之士。大夫所爲。彬彬有兩漢之風矣。先輩往學之。非徒足以順時取與而已。如其至之。是直齊肩於兩漢之士也。若僕者。其前所爲。既不足學。其後所爲。慎不可學。是以徘徊不敢出其所爲者。爲此也。在易之困曰。有言不信。謂夫人方困時。其言不爲人所信也。今可謂困矣。安足爲足下所取信哉。辱書既多且切。不敢不答。幸察。

歐陽修與尹師魯書

歐陽公以范希文被謫。以書誶高若訥。責其不背一言。若訥以書聞。遂責授夷陵令。尹洙亦同時貶逐。有書與公。而公答之也。

前在京師相別時。約使人如河上。既受命。便遣白頭奴出城。而還言不見舟矣。其夕。又得師魯手簡。乃知留船以待。怪不如約。方悟此奴懶去而見給。臨行。臺吏催苛百端。不比催師魯人。長者有禮。使人惶迫。不知所爲。是以又不留下書在京師。但深託君貺。因書道修意。以西。始謀陸赴夷陵。以大暑。又無馬。乃作此。